

## Juhudi za Kweli za Umishenari Huanzia Nyumbani

Na wote wawili walikuwa wenye haki mbele za Mungu, wakiendelea katika amri zote za Bwana na maagizo yake bila lawama—**Luka 1:6.**

Katika uundaji wa uhusiano na Kristo, mtu aliyefanywa upya anakuwa akirejea kwenye uhusiano wake uliowekwa na Mungu.... Jukumu lake la kwanza ni kwa watoto wake na kwa ndugu zake wa karibu. Hakuna kinachoweza kumpa udhuru kutokana na kupuuza mduara wa ndani kwa ajili ya duara kubwa la nje. Katika siku ya hesabu ya mwisho baba na mama ... wataulizwa ni nini walifanya na kusema ili kupata wokovu wa roho walizobeba jukumu la kuzileta duniani. Je! Waliwatelekeza wana-kondoo wao wakiwaacha mikononi mwa watu wasiojulikana? Mambo makuu yaliyo mema waliyotendewa wengine hayatafuta deni unalodaiwa na Mungu katika kuwajali watoto wako. Vita ya kiroho ya familia yako hutaka kupewa kipaumbele kwanza.

Katika mafunzo ya haki na ufinyanzi wa akili za watoto wake, akina mama wamekabidhiwa utume mkuu zaidi kuwahi kutolewa kwa wanadamu.

Kila unapochukua wajibu ulio karibu nawe, basi Mungu atakubariki na kusikia maombi yako. Kuna watu wengi wanaofanya kazi ya utume nje, wakati nyumba zao wenyewe zimeachwa bila juhudi hizo—zikielekea upotevuni kwa upuuziaji huo.... Kazi ya kwanza ya umishenari ni kuona upendo, nuru na furaha hiyo ndani ya duara la familia. Hebu tusitafute kufanya kazi ya kiasi au umishenari mkuu mpaka tunapokuwa tumekamilisha kwanza wajibu nyumbani mwetu. Tunapaswa kujiuliza swali hili, ni tendo gani jema ninaweza kufanya leo? Ni neno gani jema ninaweza kusema leo? Maneno mazuri nyumbani ni jua lenye heri. Mume anayahitaji, mke anayahitaji na watoto wanayahitaji pia .... Inapaswa kuwa shauku ya kila moyo kufanya mbingu duniani kadiri iwezekanavyo.

Nafsi inayookolewa katika mduara wa familia yako au jirani yako, kwa kazi ya juhudi nyingi na ustahimilivu wako, italeta heshima kubwa kwa jina la Yesu na itanga'aa sana katika taji yako kana kwamba umeipata nafsi hiyo China au India.